

Brian Vibert- Lettre Jèrriaise- 27/12/2025

Bouônjour à touos tchi m'êcoutent aniet, lé 27 dé Dèzembre. Ch'est Brian Vibert, chu Gris Ventre dé St Ouën, tchi vos présente la dernié lettre dé l'année 2025.

J'espéthe qu'ous avez touos pâssé un bouan Noué et qu'ous avez célébré acouo eune fais l'anniversaithé dé la naïssance du p'tit êfant à Bethléhem, y'a pâssant deux milles ans. Les décorâtions, l'arbre de Noué, lé picot et les présents ont lus pliaiche dans nos célébrâtions, mais, qué j'n'oublions jamais qu' ch'est Jésus-Christ tch'est prîncipalement au centre dé Noué.

Ch' a 'té un pliaîsi et privilège pouor mé dé prendre part ch't' année dans trais sèrvices dé leçons et cantiques dé Noué et dé ouï la prophétie d'Isaïe annonçant l'arrivée du Sauveur. L'êfant nous est né, lé fis nous a 'té donné, lé gourvèrnément est sus s'n êpaule et i' s'sa app'lé Consilyi Admithabl'ye, Dieu tout piëssant, péthe êternel, prînce dé la paix. Et j'avons 'té ramémouaithé qu'il avait lé nom spécial dé Jésus. Lé nom tchi sîngnifie lé Seigneu sauve et il est étout Émmanuel un aut' nom étout d'înmense împortance car i' sîngnifie Dieu auve nous.

Véthe, célébrons l'arrivée dé Jésus-Christ mais j'célébrons et j'nos rêjouissons en li, et tout tch' il offre à touos tch'acceptent s'n învitation dé l'suivre et dé mett' lus fouai en li.

Ch'est li, et euniquement li, tchi peut nos sauver du 'penalty' et pouver dé nos pêchés et i' n' i' y' a rein qué j'pouvons faithe pouor enl'ver la natuthe du mauvaîtchi tch'est en nous. Ch'est li seul tchi peut l'faithe. Et comme Émmanuel, il est tréjous auve nous.

Y'a deux milles ans i' 'tait auve nous phÿsiquement mais achteu, par san Saint Esprit, Jésus est présent dans la vie de châque croyant. Lé Saint Esprit vit et il est dans touos tchi aiment Jésus-Christ, ont fouai en li et ôbéissent ses c'mandements. Dieu est auve nous. Èrtouônnant à la prophétie d'Isaïe, j'mé rêjouis qué Dieu tout piëssant est auve nous pouor nous consilyi comme péthe êternel et prînce dé la paix. Qué j'sachons touos chein qué not' Dieu nous offre et qué l'învitions d'agi en nous et qué j'prions qu'i' veinge êt' rouai et êtablyi san rouoyaume tout l'travers du monde.

Mêcredi tchi veint à Mînniet j'dithons à bêtôt à 2025 et jé f'thons la beinv'nue à eune nouvelle année. Dans un sens, j'laïss'sons d'riéthe nous lé pâssé auve ses problîmes, ses gênes, d'sappointements, les tragédies, les d'sastres et les tristesses, espéthant qué j'avons apprîns tchiques leçons dé bonheu.

En embèrtchant dans 2026, j'ouvrithons un nouveau chapître où'est qu'les pages sont vièdes et l'av'nîn înconnu. Qué l'année sait paix sus la tèrre et bouonne volanté envèrs les hommes.

J'vos souhaite à touos eune bouanne et heûtheuse année auve la bénédiction dé Dieu, not' péthe êternel. À bêtôt